

So471

Regd.No.19134/88

<http://www.kbc.org.in>

NAI/220/99

No-G-4/Regd.Magazine/KBCThuso/MNP-81



# KBC THUSO

Kum 55 Ihinna

Lhaging/August 2018



## Damtheina

### Sept. 2018. Events

SHALOM  
THEOLOGICAL SEMINARY DAY - 19  
KANGGUI CHRISTIAN COLLEGE DAY - 26  
KBC WORKER'S RETREAT - 26-29

"Kapa theng, ini pumkhat ihi bang a amaho jong  
pumkhat ahitheina ding un, Nangman amahohi hong in"

John. 17:11



**Rev. S. Singson KBC Founder 95th Birthday KBC Office a kon in Date 26th July 2018 nikhon aga kimanpeh e.**



[www.kbc.org.in](http://www.kbc.org.in)



[ktolinda@kbc.org.in](mailto:ktolinda@kbc.org.in)  
[manik@kbc.org.in](mailto:manik@kbc.org.in)

**KBC Secretaryho Tour achenau Gambih No 7, 8 leh 9.**



# CONTENTS

THUMAKAI HO

1. Editorial/Damtheina Khohsah	1
2. Vector Borne Diseases/Dr. Nengboi Haokip	3
3. Halna Avat e/Rev. Henjalen Doungel	6
4. Napha tongdia/Pastor Satminlen Khongsai	10
5. Diamond Jubilee/Rev. Dr. HawIngam Haokip	13
6. Kani/Opium leh Kuki Society/Rev. Henjalen Doungel	15
7. Women Column	20
8. Youth Column	22
9. Literature Column	23
10. Education Column	24
12. Report	27-31

## EDITORIAL BOARD

<i>Chairman</i>	: Rev. Dr. HawIngam Haokip, President KBC
<i>Editor</i>	: Dr. M. Thonghosei Haokip, General Secretary
<i>Joint Editor</i>	: Rev. Henjalen Doungel
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design &amp; Layout</i>	: Hemkholen Haokip

## THUSO LAHMAN

Church/Organisation/ Department .....Rs. 300/-  
Individual .....Rs. 200/- (Post a Rs. 250/- )

Indian Overseas Bank, Imphal Branch  
A/c No. 073201000000350 IFSC No. IOBA0000732

The General Secretary,  
Kuki Baptist Convention,  
Opp. DM College, Imphal 795001, Manipur  
email: kbcindia@rediffmail.com

Advertisement bolnom hon Mobile No. 8131803543 Contact thei.  
Circulation to kisai lam Mobile No. 9862633173 bol ding.



## **“Damtheina Khohsah”**

**Editorial**

*Thumakai:*

*Amasatah in muntina um Kuki Christian chate jouse ahideh a KBC member ho jouse chung a Pakaiyu Jesu Christa minin salaam kahinpe cheh uve. Tulha thupi chu “Damtheina Khohsah” ahi toh kilhonin, hiche thudol ah chomcha ana kihoulim u hite.*

*Damtheina kiti hi ipi tina ham?*

*Damtheina kitih mihem khat dinga apumpi hop thil khat chu ahi. Mihem khat chu tahsa keoseh a hing ahipoi. Mihem khat a um chu ama tahsa, lungthim/lunggel chuleh lhagao abona anei ahin, khat panna louva hithei lou cheh ahiuve.*

*Damtheina khohsah kiti chun tahsa, lungthim chuleh lhagao abona kibang tah a damna dinga lunggel na chu ahi. Mikhat a kona insung, insunga kona veng ahiloua ahileh houbung ho chu a damthei ngaiyah ahi. Mihem khat chu adam thei teng insunga, louma a atoh ding athamding ho boilouva amolso nadinga natoh anei ding ahi.*

*Chuti banga chu, houbung jong chu amember ho hinkho – thilpeh hihen mopohna dang dang ho ahiding banga asuh bulhit lout eng houbung chu dammo a boiji ahiye. Hijeh a chu damtheina ngaiyah ahin, akhohsah na kiseina chu ahi.*

*Damtheina hi ipijeh a ikhohsah diu ham?*

*Bible a kona abaipena het ding leh kihilna ding chu ahileh, Pathen chu damna Pathen ahin, Jehovah Rapha (Keima nadamsah pa kahi) Exodus 15:26.*

*Anina ah, itahsau hi Pathen intheng ahi (1Cor. 6:19). Pathen intheng ahijeh a chu suhtheng jinga lutah a sinsah ngai ahi;*

*Athumna ah, iPkaiyu Jesu Christa'n, "Amahon hinna anei-yuva, anei letsetna dinga hungah kahi" (John 10:10) atihin, tahsa damthei tah leh ga neitah a hing dingin iPakaiyung eidei uve. Leisetna ahung lona khat jong ahi.*

*Ilungthim, tahsa chuleh lhagao adamlou tenga ahileh Pathen in eiguonpeh bang ahipon, Pathen natohna a dinga idei bang tah a kitong molso jou louvah ahiye;*

*Lungthim leh lhagaova damlouna chun society leh houbung sunga kibung khenna muchi leh boina chom chom ahin pohlut jia, hitia chu vaichat, corruption, kitha-kimat chuleh adang dang ahin pohlut ji ahi.*

*Chuleh, Convention hung kiphudoh til'a kipatna lamkai masahon anagel khoh pen u damthei lam hi anahin, tule tua dinga jong ngaichat ahi jing jeh in Medical lam hi suh pilhing ding ahi.*

*Damtheina hi iti ikhohsah diu ham?*

*Damtheina aumna dinga ngai masapen chu chung a kisei michanga hetdohna (personal awareness) ahin, hichea chu neh leh don, sil leh chen, gol le pai, lunggel chuleh lhagao hinkho kiti ho adih apha ngaiyah ahiye.*

*Ahin, kim khat chu accident jeh, toset jeh, epidemic chuleh adang danga dammo veiset na jong umthei ahitoh kilhonna igamsungu hi dammo veiset tampiho lah a kona kiven jing ngaiyah ahiye.*

*Hicheho ven na dinga chu government facility lah ho leh doctor umnalou lah a mobile clinic neiya, louthem holeh damdoi ho puma gamsung venbit jing angaiye. Chuleh, Convention in damlou kijenna ding hospital lentah nei angai e.*

*Lungthim damtheina dinga trained counsellor khat vetsuina noiya Counselling Centre khat hon a, hichea chu changval hihen, insung hihen, chuleh adang danga hijongleh damlouho damna thei ding tohuon nei angaiye.*

*Lhagao lama, eima chang leh Pathen toh kikah, insung chuleh houbung toh kikhuoltoh jinga, lhagao lama hat leh trained Pastor/evangelist mopohna noiya lhagao hinkho kivenbit jing angailheh e.*

*Tahsa, lhagao, chuleh lungthim a idamthei teng leiset ahihen lhagao lam hijong leh khantouna hung um tan tin, Pathen lungdeihoh toh muolso in hung um tante. Lunglut tah a sim jouse chung a Pathen vangpeh chang taken.*

# VECTOR BORNE DISEASES



Dr. Nengboi Haokip

## SERMON

### Introduction:

Health and Family Welfare, Government of India noiya um National Vector Borne Disease control program toh kisai natna gup aumin hiche natna hohi "Vector borne diseases" tin akihen ahi. Hiche natna ho chu ahileh- Malaria, Japanese encephalitis, Dengue, Filariasis, Chikungunya chuleh Kala-azar hohi ahiuve. Hiche natna hohi natpi pole ganhing(vector) chun anatpi(germs) chu apoh a mihem ho apehson ji ahi. Vector a um louleh natna hohi mihem in amachanga alahson theilou ahin, hichejeh a chu vector borne diseases kiti ahi. Hiche natna gup hohi India mun chom chom a hin akimun ahi. Ahin eiho Manipur gama vang tuchan hin natna thum bou aume. Hiche natna ho chu ahileh :- 1. Malaria 2. Japanese encephalitis chuleh 3. Dengue hohi ahiuve. Hiche article a hin hiche natna thum ho chung chang hi achom lam in ahung ki jih in ahi.

Malaria	Dengue	Japanese Encephalitis
<p><b>1.Causative agent (Natpi):</b> Plasmodium parasite - hiche natpi hi jatli aumin, amaho chu ahileh: i. P. vivax ii. P. falciparum iii. P. ovale chuleh iv. P. malariae hohi ahiuve</p>	<p>DEN virus - Ama jong hi: i. DEN I ii. DEN II iii. DEN III chuleh iv. DEN IV tin aum in ahi.</p>	<p>Hiche natna hi Japaenese encephalitis virus a kon ahi.</p>
<p><b>2. Vector (natpi po):</b> Female Anopheles mosquito kiti thoukang anu ahin ahi.</p>	<p>Aedes aegypti mosquito kiti thoukang avom leh akang pol hokhu ahin, hiche jeh achu tiger mosquito tia jong kihe ahi.</p>	<p>Culex mosquito kiti thoukang jat khat ahin ahi.</p>



<p><b>3. Mode of transmission (akilahson dan):</b>                  Man-mosquito-man ( natpi po adamlou khat female anopheles thoukang in ape a adam(natpi polou) mi khat aga peleh apehson ahi</p>	<p>Man-moquito-man, malaria toh akibange</p>	<p>Waterbirds/ pigs – Mosquito – Man. Twi vacha ( hohi natural host ahin, vohcha hi amplifying host akiti.Adam lou mi a kon in natna akilason thei poi.</p>
<p><b>4. Signs and symptoms (natna kihetthei naho):</b>                  Natpi po thoukang in ape jou 10-14 days le khosih( fever), votsah a kithin (rigor), ulsa lon (sweating), luchangnat, tahsa pumpi gule chaang nat, lohso, loh, oinat tiho hi ahi ji e. Lhoh a lutthei P. falciparum jeh a ahileh khohetna mang(loss of conciousness), kisa (convulsion), comatous chuleh phate a aphatcha ijen man louleh death, thina gei hi umthei ahi.</p>	<p>Anat na hi malaria nat na tobang ma ma ahi. Malaria a kimu ho chungchon na dengue natna ginmo nathei ahilou leh akicheh jep a hettheina di ho chu luchang hanat a nat adeh a mit nunglang totoh a, guchin changchin nat (joint pains), tichung dup (rashes), nah leh hani ho a pat thisan pot (bleeding nose &amp; gums)hohi ahi.</p>	<p>JE natna jong hi malaria natna toh akilou in ahin malaria a kimu ho chungchonna JE kicheh a hetthei na hochu ahileh lungmot, khohet na mang (loss of consciousness), moh pao pao (irrelevant talk), kisa (convulsion), athitobang (coma) chuleh thi (death) tihohi ahi.</p>
<p><b>Diagnosis ( vet/mat doh na):</b>                  Government hospitals (DH, CHC, PHC, PHSC) ho jouse chuleh khosunga ASHA ho leh MPW ho koma man beiya test kibol doh thei ahi.</p>	<p>JNIMSH (State Referral Laboratory, IDSP, Microbiology Department, JNIMS, Porompat) a manbeiya kivet doh thei ahi. Mundanga a kive doh (test) ho khu oi ahipoi.</p>	<p>JNIMSH (State Referral Laboratory, IDSP, Microbiology Department, JNIMS, Porompat) a manbeiya kivet doh thei ahi. . Mundanga a kive doh (test) ho khu oi ahipoi.</p>
<p><b>Treatment (kijen na):</b>                  A dammo ho jouse manbeiya lou kipe thei ahi. NVBDCP staff hon ama ama kho a lou ahung thah uva aneh didan hi kho a ASHA hon avetsui peh diu ahi.</p>	<p>JNIMS/RIMSH hospital ahilou leh hospital len ICU facility um na a jendoh di ahi.</p>	<p>JNIMS/RIMSH hospital ahilou leh hospital len ICU facility um na a jendoh di ahi.</p>

## Prevention (kiven di dan):

Sapten "Prevention is better than cure" ati bang in vector borne natna hohi kiven doh hi apoimo pen e. Hiche kiven na hi mijouse boldi ahi chuleh government noiya department chom chom ho jong ngai ahi -.multisectoral involvement.

### 1. Personal Protection:

Thoukang kipe sah lou hi kiven na pha pen ahitai. Hiche na dinga chu thoukang lou (mosquito repellent – odomos, good knight, electric vapour mats etc.) ti ho hi thoukang pena loudia sun teng ahilou leh imut ma a man thei ahi. Hon le lou ahilou leh polanga ipot doh di leh sangkhol toka achol ikhut ikeng tom jou thei di man in angai ye. Khojin kon teng window curtain ho phatah a khailah a kot ho pha tah a kha tupdi, insunga thoukang lut louna dia ahitheh leh kot (doors) le kotneo (windows) ho a hi thih len na ganhing dal na di sem in apha. Jan imut teng thoukang len (mosquito net), ahitheh leh lou a kide doh sa mantei tei di ahi.

### 2. Source Reduction:

Thoukang ahung pi lhin masanga subei na di government noiya department chom chom hon asuh toh thei tampi aumin, ahin eihon eima ho hina ibol thei themkhat hochu noiya hin veuhite:

1. Twi kikhol nathei umle bel, tyre se, pahcha bel, dispo cup, plas-

tic bottles, (any water containers/receptacles) ho hi polanga peithang/ koithang louhel ding.

2. Twikholna ho jouse inchung (overhead tank), in noi (ground), in na kimang brite, bucket, syntax, bel, ho jouse hi asin kitup tah a sin ngai ahi chuleh twi potdohna (water outlets) ho hi len na sin di ahi.
3. Asin kitup lou twikhol na ho, fridge twi kholna, A.C twi veina, in vella twi along doh louho jouse hi hapta khat seh le suhgot di ahi. Aki sugo thei louho hi thao them khat ham lou them khat ham hapta seh le sun khum di ahi.
4. Twi kul (well, water tank) ho hi asin net bol peh di, aki mang lou ho hi lou lhah khum di ham ahilou leh huhbing in apha.
5. Twi veina kom (drain, canal etc) ho ahi larvivorous nga ho lhalut thei ahi.

**3. JE a kon a kiven na phapen chu** ahileh kum 15 noiya chapang jouse vaccine kap doh di ahi. Tu lai hin government in 9-12 months chapang hohi free a JE vaccine akap peh u ahitai. Che apatna lha gup jou leh khat vei aki kap kit leh JE natna akon a kivingdoh di ahitai.

4. Vokul chuleh vatot buh hohi ina patna gamla thimjep a sem a chuleh phate a suh thengjing ding ahi.



# Baptist houbung ho houin kaina a HALNA AVAT E

*Rev Henjalen Doungel  
Mission Secretary*

## SERMON

Pathen thusei hi jattampi aume. Thusei kon khat chu seithem tah, aseijouse milung tongkha thei, angai jouse kipa thanop sah thei aumin, konkhat vangchu seithem behlou chule mipin athusei jong lathei behlou loi jong aum kite. Hijongleh Pathen thuhi seithem vanga hilouvin Pathen amatah natoh na a lolhin le lolhinlou thu umji ahibouve.

Pathen in athulhangsam ding in milolhing ho sangin mikatah ho adei joi. Pathen thuseia houbung lamkai khat hidia kigot na neiho Pathen thuto kitoh a thusei ahithe nadiu lampi 6 ahung kitah lang e. Pathen thusei hohin houbung sunga mipite thunun na lentah anei

un amaho kitah nale tompana a chu houbung damthei na le khantou na jong kingam ji ahi. Chule houbung khantou kihetna houin kai thanop umthei nading hi Pastor/Head deacon khuta lentah akingam e.

### **1. Thusei pachun Pathen letna le loupina hi ahasei angaije.**

2 cor 4:5. "Ajuh chu keihon keimaho hilouva Christa Jesu chu Pakai ahi tia chule keiho jesu jalla nangho soh kahiu chu kalhangsap leu ahibouve".

Pathen hi leiset chung boina jouse sanga lenjo ahi ti hi Pastor

khat in aphot jouse a houbung mipite ahethem sah ngai ahi. Akhoh tah khat chu Pastor/Head deacon tamtah hin Sunday ni jingkah thupi alhen na a mipi ten itabang thu angaichat uham ti hi ahethem ji pouve. Hiche ni lehin houbung mite hetsah dinga deium khat chu tahsa lam kiman chah na tohle tham jeng geln a haptasunga lungthim pumpi hung kimang cha ahitan Sunday nile hin lhagao hinkho to kisai a lungthim sung programme thah sema Pathen lam nainading toh gon neiding ahi ti hi mipi lungthim sunga khum peh ding ahi, chuti leh amaho chu hung

kipah doh un tin houinn kaina, chule lasah thusei na hung nom tante. Hiho sodoh thei nadia hou-lamkai chun mipi chu akithopi ngai ahi.

Tulai media hat lai hin mitam-tah in bible a hinding dan kisei ajuijou tapoi, lungthim pumpi hi nitin thilsoh hon Pathen a kon akaimang jin hijong leh lamkai pu chun hitabang lungel lungkham na lungthim hoa kona houbung mipi chu apuihoi angaije.

## **2. Houlamkai chun mipi chu boina atoteng bible a kinung le kit dia aseipeh ding ahi.**

2 Tim 3:16-17 "Pathen in ahai-khum Pathen lekha bua thu kisun chengse chu kihilna a, kipho na a, kipuijang na a, chonphat kisin-sahna dinga phatah ahi".

Lamkai in ahedding chu lhagao hinkhoa houbung mite boina jouse chu bible a adonbutna/asuh lhapna aumin ti ahi. Hetthem lou jeh in houbung mipite bible a kon hilou lamkai hina a amachang lung gela pu-iding agot jiteng ministry a aloh-ing jouji tapon ahi. Pastor natoh pipen chu ahoubung mite bible simnom saha athua hin pui lut ding hi ahi

## **3. Houlamkai chun houbung mipi te chu bible iti sima man chah ding ham ti aseipeh chet peh ngai ahi.**

2 Tim 2:15. "Nangma kipatep them chang banga pathena kip-

ehna dingin gunchun pon panin, jachatna beihel natong mi hin, thutah thu chu jangkei chan mang chan".

Bible hi lekha sim hahsatah khat ahi. Bible chang in aseipeh kicheh tah a het kiti hi lhagao natoh na ngai ahi. Mipi houkhom na ahi lamkai pa chun mipi te chu Bible a Pathen mite chan chih na chu akithum uva ahileh chang thei ding ahiuve ti atahsan uva ataon-adiu a atil doh thei ngai ahi.

Chule ichan a Pathen in amalung chang asuh thou va akipa sah hitam ti hi mipi te aseipeh a asu-thou thei ngai ahi. Athupi sei chu mipin anethei nai ti hi amai-souva ahettei ngai ahi. Thu chu mipi te chun houhil pa akon ahung jahuva ahettei u ngai ahi, hiche hin amaho thanop na asuh dim ding hitia hi mipi te chu lhagao hinkhoa kisuthou diu ahi.

## **4. Houlamkai chun bible hi aboncha amite ahil thei ding ichan a thanei le thil bol thei ham ti ahete a ahilthei ngai ahi.**

Acts 20:20, 27 "Ijeh inem itileh Pathen thil ngaito jouse najah uva im kanei aumpoi".

Mihem khat chun bible a mun khat chu adeisah a mundang sanga asimnom jep chu umthei mong ahi. Ahin asimnomlou pen jong chu Pathen hinna hu lhakhum bible mun ahin abona lhago khantou nadinga sim tei ngai ahi. Lamkai chun kumsunga

hi seisa sa seilouva lampi jouse hop a mipi ten angaichat bible chang cheh a houlimna anei peh ngai ahi. Aman adei lai mai hilou ding ahi. Lamakai lolhing tah ho chu Pathen thu sohin apang un hichu jana neitah in aseiphong jiuvin ahi.

### **5. Bible a um thudih hi mipi ten ahin naova anei uva hiche dungjuija chu ahin nadiu va aseipeh ding ahi.**

James 1:22 "Ahin nangho nangmale nangma kilhem lha a thu chu angai mai jeng hilouvin thu chu abol a joh hiuvin".

Hetna tam tah kinei henlang hinkho kikhel na hinpolut taheh beh leh ipi phachom ding ham? Houinn kaia hung ho chun thusei pan aseido Pathen thuhing ajah chu amahin khoa kichou na le kitil khou na a alah thei ngai ahi. Hiche mite response hi khat le khat vang kibang lou ding ahi. Kitah nahin kho man nading ham, ngaidam thumna hin kho, ahilouleh vaicha genthei kithopina ding a kichou na ham a amading a alah cheh u ngai ahi. Pathen thu kisei jouse he thuhing ahin mihemkhat hinkho atoh khah tei ngai ahi.

### **6. Thusei pa chun Bible hi atilapat um ahin, tunichan a mihemte hinkhoa dia kihil na phapen ahijing nalai je ti hi ahetsah angaije.**

Deu 32:46-47 "...tunia keiman

kasei thu hijatpi hi nang hon nalungthim sunguva nakoisoh kei diu, chutengle nang hon jongnachte henga napehson theiuva amahon jong hiche dnthua kisei jouse hi aboldoh theina diuva ching thei diu ahi".

Minute 5 tabang bible hi gaphong keh lechun simnom umloutah khangthusim namu paingal ding ahi. Hinlah Bible mantam na hi Pathen mite khangthusim kisim a kon adihtah thilsoh ho kihea hichun tuni nikhoa dinmun kicheh jepa Pathen thu hetna asosah ahi ti hi mipi techun aheth doh u ngai ahi. Min ngainom louva asim nom lou bible chang ho jong hi Pathen a kon ahina le athupi na mipi hil them ngai ahi. Pastor/head deacon ho hin bible hi anikho le aphant to kitoh a hilchet je aheth ngai ahi. Mihon Pathen thusei dinga amun amuna eikou jehu va pastor lolhing ihi pouvin pastor lolhing tah chu bible a kisei thuho amite dinga ngaichat dungjuia aninia athah thah hin polut a houbung mite Pathen thua vah va jing ho chu ahijoi. Chule mipi lhagao hin kho kipa sah thei ho chu pastor lolhing kiti ding ahi.

Hitabang houlamkai khatin aneiding le abolding ho ilhah sam jeh un Baptist houbung atamjo hi Houinn kaina a halna le thanop na aumthei ji poi. Angaija pule pakhanga pat anakiche pijing houinn kaidan jong akikhel

pon, La kisa jong Pathen vahchoi nala hilouvin kingakhol nala joh ahijin, Pathen thusei houlamkai in mipite ngaichat ipi ham ti khol louvin aman angainom le aseithem thupi khat akilhen in aseijin, bible chang alhenjong anikho toh kitoh a lethei nale ahoubung mite ngaichat na lama ledoh thei na anei pon, Pathen thusei chu natoh/duty khat na anei jeha sei mai mai pohnat na pang lou, aphot to kitoh a lasah ding lhen je helou, Masanglai houbung la tilou lading mipi sah ding phal lou, lhagao kipana neija hung haldoh aum jong leh houbung miten tosot theilou, Houinn kaipet leh chaloh louding, paopoh louding, chatloh louva taona man ding, thusei pan jong pulpita chatloh louva thu ase ding, houinn kaisot sah lou ding achom nathei pena kaiding, thusei sao louding, vahchoi lasa tam louding, phat ong honlou ding, taona ngaichat thumna phat hon lou ding, hopsom sumhung lut jat mipi anga simdoh tah lou ding, maicham phunga thil hung kitoh achom thei pena lhandoh na taona man ding kiti ho le adang dang hi tulai Christian te Pathen houdan ahitai. Hijeh hin Pathen houkhom dinga phat man khom hi lungna chim na aumtapon, lungna chim a vahchoi lasah na aumtapon, kino in akimathah in Pathen houhi kipa

thanop a halna phat hitalouvin nitin hinkhoa angaia chondan khat mai mai danin aumdoh tan ahi.

Chukitle tulai hin thusei tamtah hi kigotna um lou helin Pathen thusei din pulpit akal doh un, kakigo man poi atiuvin pulpit chung alhun teng alungsun-guva hung kilang jouse ase un ahileh kigotna umlouva thusei ahi jehun angah phat jong ahe kit tapou vin amumal um lou vin thusei tamtah hin houbung mite phatman tamtah aphachom beihellin asuhmang peh jin ahi. Houbung sunga Pathen thusei ikilhan kitun seiding helou tah kigotje jong helou khat thumun ipe kit un mipi te dinga kitil doh nathei ding imacha ase doh jou tapon phachom loutah in houin kai ikihen doh jiu vin ahi.

Hitabang dinmun hi houbung sunga idinmunu ahinah lai jeh hin Baptist te houbung atamjo hi halna aumpoi atiu adih e. Hijeh hin houinn kaihi nom hen, halna umhen itiuleh chung a kisei thilumdan hohi phatah a ikhol gil uva khelthei ikhel uva aphot to kitoh a halna neitah a Pathen hou ding hi ikithah bol uva houinn kai a hung jousen Pathen to kihou lim dingle Akoma kilhan dinga hung kahi ti gelcheh a ahung teng Pathen houkhom na nom tante.

# NAPHA TONGDIA LHATDOH IHIUVE

Sermon for Youth Employees' Day

*Pastor Satminlen Khongsai  
Secretary, Youth Department, KBC*

## Sermon

EPHESIANS 2:20

*"Ajuh chu eiho Ama khutsoh ihiuve; chule ichonphatna dinguva, masanga pat'a Pathen in agotsa chuche chonphatna dinga chu Christa Jesua kistem ihiuve."*

*Hiche Bible changa kona kalah doh nom chu ahileh "chonphatna dinga" kiti hi chi. Hiche thugol hi Greek paova chun 'ipi ergois agathois' ahin, hichun 'for good works' (English) 'natohpha tong dinga' tin kiledohle dihjonte.*

*Mi tampi lunggel um chu Christa a eikilhatdoh hi vangam lutna ding ahi. Huhhingna ichan u hi vangam ijatnadiu chu ahinai, ahin hichea chu kichai ahipoi. Hichu ahidingleh Pathen in napha tongdinga einganse louhel diu ahi. Hichun avetsah chu ahileh huhhingna ichan u hi vangam chena ding jenggeh hilouva hiche kal a jong thilgon um ahidan muchet ahi.*

*Hito lhon chun Pathen in Napha atohna a kon'a jildoh thei tampi umjeng jongleh khatle ni ana seidoh utin, hichu kitilkhouna thudoh in ana chai ute.*

## I. EIHO AMA KHUTSOH IHIUVE

Bible chang chun 'eiho Ama khutsoh ihiuve' atin ahi. Hiche a jong hin Pathen in 'Napha atohna' kichehtah akimudoh in ahi. Semtilbu 1-2 sung ivetleh kicheh tah in mihemte hi Pathen khutsem khat, alimle amel'a asemkhat ahidan kicheh tah a mu ahi. Hiche mihem asem'a chun akhut tah in leingan ala in ana semme. Hichu Pathen in Napha atoh'a thil asemndan muchet ahi.

Hiche a chun akichaipon, hiche lai hi Greek a ivetleh 'poiema' akimangin hichun akisemchai khat kiseina jeng hilouva 'chingtheitah/hoitah a kistem' tina jong ahi. Hichu ahileh Pathen in na atohjouse hi chingtheitah le lunglutah a asem ahidan atahlangin ahi. Pathen in leiset chungu umjouse hi athu alha jongleh umjeng thei jeng ahi, ahinla mihem ahin sem vanghi tha alut sah in, hito lhon chun atohjong chu alimle amel aputsah kit in hijeh chun chingtheitah in ahin sem in hichu mihem ahunghin ahi.

Natoh kitih Pathen a kon'a hungkipan ahin asemsa mihemten jong ama khonung ijuinao khat chu natonga hinkho manding chu adeisah ahi. Hijeh a chu "natong nomlou chun ann jong nehda hen' (2 Thess.3:10) ati. Pathen in bon na atohle, mihem ipi kihija natohnom louna kinei dingham? Natong nomlou chu chonset a jong seithei ahi. Semtil in jong Pathen in Adam chu ahinkho lhumkeija na ahintoh ding jong ana seisa ahitai (Gen. 3: 19).

Ephesia bung 2 a kon'a hiche chungchang thu kiseihi phatah a ivetleh 'eiho hi ithemmo nau le ichonset nauva ithipet tah uva, Pathen in eihin sah u' (Eph. 2:1) ahidan kichehtah a kimukit chu ahi. Hichu ahileh michonse, Pathen lungsetna chang joulou mihemte hi Pathen amatah in na atoh'a michonse, mihoilou, kidah

um, thenlouna um, damun jonding mihemte chu a Chapa Jesua eisemphat u ahi tai. Hiche jong hi Pathen in mihemte dia Napha atohna loupitah chu ahi.

## II. EIHO AMA NUNGJUI IHIUVE

Bible chang chun "masanga patna Pathen in agotsa napha tongdinga" akitin ahi. Mihem te hi huhhingna anei nadinga hin Pathen in napha itoh diu anghen pon ahi. Amavang huhhingna changsa jousen vang Napha atohding hi ama khonung jui ihinau ahijeh in ngehna aum in ahi. Mihem koimacha Napha atohjeh in Pathen kom'a athem channa ding aumpon ahi. Ahinla Pathen mitvetna them chang tasajousen napha atohdiu chu Pathen a ihinau photchetna, ama nungjui ihinau musahna kichehtah chu ahi.

Napha 'ergois agathois' tongdinga Christa a lhatdoh akihi leh tuhi napha tohna ding phat chu ahidan jong akicheh in ahi. Ajeh chu vangam chu natoh pha tohna ding phat ahitapon, natohna ding phat jong umlou ding ahitai. Pathen in napha tongdingin mihaosa, aneijou, aching athem, abolthei akoupon ahi.

Mihem khat in napha ahin toh teng chuleh Pathen atahsan photchetna ahidan kimun ahi. Ajeh chu Tahsanna kiti chu Pathen toh mihem kijopmatna manchah ahi. Hiche tahsan chun napha tohna ahinsodoh kitji ahi.



“anatoh beija tahsan pannabei ahi” (Jacob 2:20). Pathen tahsanna hi atoh in ajuitei ahin, napha tonglouva Jesu nungjui koima umthei lou ahi. Christa a lhatdohna hi Pathen in napha eitohpeh jal u ahin, Eihon napha itohdiuhi ama khonung ijiunaule eikilhatdoh lo nau ajehpen chu ahi.

### **KHANGDONGHO TILKHOUNA:**

Pathen phatthei bohna jal in KBC khangthah lah a hin aching athem ahung kisp jingin, natohna hoitah tah hinmu jong akum tin in apunbe jingin, kipa umtah chu ahi. Natohna hoila adeibanga muloulai, chule mujoulouva kigel jong aumdingin kaging chan ahi. Chuban in lekha simjou talouva natoh jat chom chom tonga koima hetlouva misanga neojoa kigel’a hinkho mangjong umtei dingin kagelle.

Ahin Bible in vang Government service hihen, Private a natohna hihen ahilouleh louna tohna hijongleh, itohna a ‘Napha itoh’ dingchu athupipen in akoiijin ahi. Service thupitah, private company a natohna hoitah kimu a Pathen hetphah louna ahi khahleh hichu hamsetna joh ahinalaije.

### ***Hijeh chun thudoh phabep kanei nom chu ahileh:***

- Tutua itobang dinmun changa nakigel em?
- Katheplou jeh in kaloi kagol ka-

phajou tapoi nati ji em?

- Inchen vaichatjeh a nadeichan naphah joulouva nagel ji em?
- Natohna nei nahileh kojial’a natohna mua nakigel em?
- Natohna mun’a ichan’a napha natoh doh a nahet em?
- Pathen a dinga napha natohdoh ijat nahet tah em?
- Pathen in napha natohna ijat nahet peh dem?
- Natoh hoitah nanei jeh a midang musitna nenei khah em?
- Nanatoh chu nakiletsah pi khah em?
- Natohna nanei masanga Pathen nahet toh tua nahet ichan kalbe em?
- Nanatoh na chun Pathen toh nakikah asuh hoi em? Asuhset em?
- Pathen a dinga Steward/neiching ihiuhi nagel doh khah ji em?

### **Thuchaina:**

Pathen in nangdinga napha atoh geldohjingin, sumil loujen in, hichun nangjong Pathen cha khat hina’a napha nahin tohna dinga natilkhohu jing ding ahi. Vangam lutna ding jengseh a lhatdoh ihipouvin, napha tongdinga lhatdoh ihiuve tihi sumil hih in. Napha tongdingin avaicha aumpoi, aneijou jong aneidungjuija napha atohding alen in avai jong avai dungjujija napha atohding umcheh ahi. Napha tongjingin, na-napha tohcheng chu athon’a kilelou hel ding ahi.



## KBC DIAMOND JUBILLE MATERIAL RELEASED

By: Rev. Dr. Hawngam Haokip, President, KBC

Kuki Baptist Convention in 2018 November lha a Kum 60 lhinna Diamond Jubilee iman diu toh kilhonna tuni 11-07-2018 nin hiche Salem Sapormeina KBC Centre Church muna Pre-Jubilee celebration materials manchah dingho lhandoh na ding phatpha eipeh jeh un amasan Pathen thangvah in um taken. KBC kum 60 lhinna iman diu to kilhonna KBC thusim achom lam a igeldoh diu deium kasan anoija hin achom lam tah in kahin tah lange.

KBC hi 16th March 1958 a KBA le NEKBAM (Kuki Baptist Association, Manipur) le North East Kuki Kuki Baptist Association, Manipur) ana kigom uva, Paokhat tho, denomination khat hina a Kuki Baptist Convention tiu hitin, kigom u hitin thakhat le lungkhat in Pathen na tongkhom tao hite tia ana kigom ahiuvin ahi. Hichea ana lunggel ule ana toh u hi ivetle Bible John 17:11a Pakai Jesun eina taopeh naotoh aki toh in ahile lunglhai aum lheh jengin ahi.

Ahinlah vangset umtah in ahung kigop khom khom uva kipat nin boina toh hung kipattha jeng bangin ahung kilangin ahi. Centre le pao thun ahung boi pan uvin achai na in KBC aki subei tai tin 1st September 1967 ni chun KBC natong ho chu KBC centre, Motbunga konin nodoh in ahung um taovin ahi. Chuti chun KBC a konin (1). Thadou Baptist Association, (2)Chongthu Baptist Association, (3)Kuki Christian Church ahung kistem doh in kipumkhat na dinga ana sem u ham kiti chu aphut doh ho tah lamkai na in kehli ahin so taovin ahi. Hitobang hahsat na lah a hung khang len ahi jeh chun KBC natong masa hin lha tolop(salary) imacha jong ana kisang joupon genthei tah in hinkho ana kimangin ahi.

Hiche jeng jongle KBC hi ana kibil phudan Bible toh kitoh ahi jeh

chun Pathen in ahin phung vuh in tuhin eimi society a houlam a kil-oikhom nas lah a alenpen khat nin ahung umdoh thei jin ahile Pathen thangvah louthei ihi pouve. Tutua KBC dinmun jong hi Bible toh kitoh a kengthum a ding ihiuve ti hi isuhmil lou diuva tuchung Diamond

Jubilee iman diu toh kilhon na hung kitah lang ahi.

1. Unity (kipum khat) Pakai Jesun eitaopeh nao (John 17:11) The High Priestly Prayer.
2. Mission (Nganse na Len). Pakai Jesun toh dinga einganse nao (Mathew 28: 19) The Great Commission.
3. Service (Vaicha genthei kithopi ding) Pakai Jesun toh dinga eipatoh doh peh u (Lk.4:18); Nazareth Manifesto.

Hicheng thum natoh a pohdoh na dinga sappao (English) as agom lam a iseidohe le " Ecumenical in Outlook, Evangelical in Approach; Practical in Service" kiti ding ahi.

1. Ecumenical in Outlook: kiti hin kipumkhat na (unity) thupi ichepi naova hi Christian jouse hi Jesu nungju i khat hikhom najalla Christa tahsan jouse Christa a sopi hina mitvet a vetding ; ama vang Baptist hina a idin nao va chu det chetna din jing ding tina ahi.
2. Evangelical in Approach: Kitina hin mission hi idin nao khat ahi to lhon a itoh jouseu Pathen thu, Gospel kipana thupha machal nadinga bolding tina ahi.
3. Practical in Service: Kiti hin vaicha genthei kithopi hi (service) seitho maimai hilouva natoh a pohdoh ding tina ahi.

Chunga kisei KBC keng thum a idin naohi tu masanga ina hetchet lou uva ahi jongle tua patna ihet uva, natoh a ipohdoh uva ihin pi cheh ding uva KBC houbung hole ami chang cheh tiem ihiuve. Mathew 7:21 a chun Pakai Jesun " Pakai, Pakai eiti chan chu vangam a lutding ahipoi; koi hile van a um kappa lunglam bolpa bouchu lut ding ahi " ati

Pathenin KBC lamkai hen lang, umpi jing henlang, phatthei boh jing ta hen.

Pakai Lhacha  
Rev. Dr. Hawngam Haokip  
President, KBC

# Kani/Opium le KUKI SOCIETY

*Rev Henjalen Doungel  
Mission Secretary*

## **Sermon**

Achesa nisim 21 June 2018 nikho chun Shree N.Biren Singh honorable Chief Minister of Manipur to kimu to na anakinei je.Kani lei ibol uhi muchi chom danga khelthei nading lampi gelkhom na toh gon nei nadia Houlam kai jin Government thunei vaihom akimu pina masa pen hidin tahsan aume. Kuki Baptist Convention in hiche imuchi tu uhi lul tah in akigel in hiche hin tahsa le lhagao hinkho asunoh phah in,mitam tah tahsa le lhagao va kipah thei louva lungop kaitah a Christian hinkho mang akimun hijeh hin hiche mihem te boina hi kimai to pi din akigel in namsung semphatna ding le tah sa le lhagao kicho thou kit nadia poimo tah mopohna khat in akilan ahi.Govt agency ho Social welfare to kitho khoma hiche muchi hi iti leh KBC houbung kitunna gamsung a kikhel thei ding ham ti ngaito na a kivai kon ahi.Ajeh chu hiche muchi hin khonung leh ichan a inam sung ahin sukhkha ding ham ti hi igel leh lungkham umtah ahitai.Medical term a dihtah a kholchil a kipodoh hihih jong leh hiche muchi hin isociety le insung chule houbung ichana asuh khah hitam ti chom cha anaveo hite.

**1. Economy:** Mitamtah gel dan in hiche kani ibol uva pat in sumle pai aneng in society sung ahung khangtou vin anneh tuidon avat tapoi,khopi hoa inmun lou mun icho doh un,chele valena ding gari jatchom chom ikilam doh un tuhin mitoh ihung kilou dom taove ti ahi.Ahin mihem khat hinkho sumang thei muchi itu uva ilam doh u nei le gou hi eidin thilphatah danin kilang jong leh koitabang insung khat in kanale thina a anei ahijeh in phatthei chana haona ahipoi. Lhomcha peha tamtah muding leh haoloi chal ding lung put kinei hi Pathen lungdei ahipoi."Haonading mai maijin na tonghieh hel in,chule jou le jon a kon a haodoh din geldan,Hitabanga namu thilchu namit tenia namu pan bepleh abei paiji tai,ajeh chu apet peta alhaving keh abang jengin,vanlam ngan muvanlai bangin aleng tou ji tai"Proverb 23:4-5.Haona ding lungel hanei behset kiti hin mihem khat chonset na lama apui lut thei je,chule hitabang a kimu haona chu asotpon chomlou kah in muvanlai lenmang bangin aleng mang ji tai tin Pa-

then thun aseije. "Het man louva kimu neile gou chu chomkah louvin beiloi jin tin,neile gou athem thema kikhol khompa neivang pung cheh cheh jeng ding ahi". Proverb 13:11. "Pakai phatthei boh vangin mi ahaodoh thei jin hiche a hin aman gim genthei na apeh be poi". Proverb 10:22. Pathen a kon phatthei na haona chu khonung chate tuten adampi diu lolhin nale phatthei channa a anei dingu Pathen thutep ahi. Hinlah Pathen lunglam louva neilegou akilam teng apettah a ninglhin natah ahivang in khonung chate tute khang a vang muvanlai lenmang bangin aleng mang jin chuche a jong kichai louvin chate hinkho changei mollem nan ahung pang jin ahi. Hijeh chun hiche muchi a kon neile nga ilam doh uhi insung khanga dinga lungmon pi thei ahipoi ti hepuma maban loulho natoh dan ikigel phat u angai jin ahi.

**2.Social stigma:** Kani lei bol jeh in inncheng danin kingai to jong lehen Government le society damthei tah semnom ho mitvet in thinathei muchi tute ihuvin thet umtah nam mite ihuive. Society sunga gucha, khamnathei bol, khamnathei joh, joule nala thusei, numei chung a chonchavai a jalhang hinkho suboi jing ho mipi ten amuda bangun Kani lei bol nam mite chu koima munom achang poi, ajeh chu chengkhom nekhom donkhom akihi jeh in ijo leh kacha kanao vin hinnekha leh

ti kichat nan adimun ahi. Hiche kani lei kibol na a hin koi man thudih asej pon, atohga mujat jong kipah tah le thanom tah in mipi laha asej ngam poi. Joule nal jeng in alengin, guchat lachat atamin khonung nampi khompi hung hiding khangdong tamtah hinkho hiche muchi hin asusen ahileh khonung society ding gela thilpha bol nom hon hiche kani leibol hi kipal na lenpen in agel un ahi.

**3.Ecology.** Mihem hi thing le song to kihing khom ahi. Thingpung tamna a gotui atamin gotui tamna a muchi chivo aphaathei jin muchi phat na a mihem hinkho adamthei jin ahi. Joulei kiti hi lungset umtah leh ngainom umtah leibeh/lhang khat kisei na ahi. Angaia Pathen thilsem muchi chivo hi joulei a phajep a tuijong tui jep ahi. Ahin Kani lei ahung kibol a pat joulei ipia kimang tam? Leipha ahina jong khoptalou vin Chamilcal fertilizer tampi pi kani phung phat nading le ga so nadin isung lhaovin ahileh, kani ahoi jin, anai atam in sumtamtah munan inei un ahi. Hinlah leiset chu ichana isuh setu hitam? Ingaito khah uvem? Tunin joulei hoi lai jouse akivat chai soh in ahileh gojuh dai kai ahoi tapon gam asan, go ajuh leh lhang hoh along in vadung tui alen jin inle lou tam pi kum seh in asusen chukeo hilou vin tuilet jeh in mihem tampi hinkho amol lemjin ahi. Joulei kiti inei gam tapou vin ahileh don ding tui il-

hasam tan, ituikhuh hou jong don ngam aumtapi, anahlang kani lei ibolun chemical fertiliser tampi kisunga hampa tha nading insecticide tampi kimang cha ahijeh in atuijin athamin ahung longlhan tuikhuh a hung put tuijong atheng tapon masang joutui chu ahitapi. Dam mona jat chom chom masanga anakiheha lou tampi hung kona tuikhuh joh ahigam tai. Hampa tha nadinga chi tampi kithe luta chule muchi phat nadinga Chemical fertiliser kimang hin leiset at that in kum phabep jouleh igam leiset uhi muchi imacha ihin tuhing jou lou nadiu nikho ahung nai jin ahi.

**4. Lhagao hinkho:** Mihem ten iboi piu hi khonung thinung hin kho ahi. Konkhat in avela apen kit teng mihaosa, mithupi khat a pen ding kinepnan thil pha abol e. Ahin eiho christian ten vang thitheilou lhagao hinkho Christa to umkhom thei nadin leiset hin kho hi iboipiuve. "Pathen intheng nahiuvu nasunguva Pathen lhagao achen chu nahet lou uham? Pathen intheng sumang a chu Pthen in amachu asuh mang ding ahi, ljuh inem itileh Pathen inchu theng tah ahi" I Cor.3:16. Hiche tahsa pumpi hi theng tah a koiding, lungel, lungput, natoh, thilbol, Pathen dei lama hinkho manding chule anneh tuidon khamnathei a lop louding ti hi Pathen thupeh ahi. Mihem khat chun tahsa thina thei leh lhagao hin kho tongkha thei umchan

chonchan ahilou leh nehle don ahin bola ahin nehtengleh hichu amadinga thenlou na ahin Pathen in apha pon ahi. Tunin kani nea ju donjing ho koima lhagao hin kho a akipah aumpoi. Chule kani lei bol ho jong akipah pon lhagao va pilhinga Pathen in anganse na lhagao huh hing nadinga keima jong Pathen a konnganse chang kahi tia mopoh na lahon mihemkhat hinkho sumang thei, inchen suse thei leh lhagao hinkho sunoh phah thei muchi tunan apha penom ponte tit ah san aume. Hiche khamnathei ja hung lop ho hin ama tahsa jengbou agel khoh un hinlah thina lam jona che ahilam akietpou vin ahi. Tahsa lung olna ahol un amupou vin, lhagao kipa najong neithe lou vin aum un ngathe lou dinmun ahinphah tengu leh jousei, guchath ahin bol un khosung a din vetset leh theida ahung um ji tao vin ahi. Inchen lung ahin vil tapouvin vaichat nale lungkham na insunga ahin lhutun insung Pathen houna le kivaihom ahin tongkhatan insung mijouse kipa lounale lungkham na ahung dim jin achainale thinan insung ahin lonvuh ji tan ahi. Hijeh chun kainsunga kacha kanao atoh khah lou pouleh tithei te ihi lou jehun hiche muchi itu uhi agangthei penin ngaohitin muchidang khatjoh boipi tao hite ti hi ideisah u ahi. Chuti leh itoh chungah kikipah in tin ilhagao hinkho jong haldoh tante.



## Hiche chung changa mihem te pan lah dan.

**Govt. panlah dan.** Mihem khat hinkho susethei muchi ahijeh in govt in gamsunga mipiten alei alho uva kihin so na a anei ding u aphal pouve. Hijeh chun suhmang tei ding agouvin khat vei kom komle centre lama pat thuph in ahung vat lha jiuvin mitam pi dip dam tah in ium jiuvin ahi. Hiche muchi hi suhmang a akhel ding agamleiset toh kitoh muchi dang eipeh nadiu leh muchi hung lhun teng ajoh nading lampi eiko mupeh diuva Govt. to kihou na kinei jing ahi.

### Gam haosa ho pan lah dan:

Hiche hi jat nia sei thei in aume. Kani hin mihem khat hinkho le in-sung society sung ichana asuhset a, namkhat khonung le ahin hatmo sah ding ham ti hetthem jeh leh, hiche muchi kibol na gamleiset a chemical tampi akithelutna leiset akisuh set deilou na jeh in agamsunga tusah/lhosah talou haosa Pathen he phabep aumtan ahi. Kho khata haosa khat hin akhomite kani lei bol talou dinga thu apeh leh inn phabep khat akhosunga kon in akichao doh e ti thu akijan ahi. Hitang a haosan pan alah hi apet tah in khochaga ngailut lhahsam na danin kilang jong leh hiche haosa pu hin Pathen in apeh agamleiset hi aventupma nikho khat leh khosung phat thei achan nadinga thil phatah abol ahitai.

Haosa kon khat kit chu agamsung a khochaga hon muchi dang atu uleh khomi hina a tax alah thei lou ahi. Hinlah khochom choma kon tax apehuva agamsunga kani lei ahung bolu ahijallin akhocha khat jong chun kani lei abol leh tax akilah in abol sah tan ahi. Hiche hin ichan a agamlei set asuhset a akhosung kiva hom na asuhboi ham ti akhol tapoi. Kani leilhou tam na khosung a chun gucha atam in gucha tam na a thunoh boutam na atame. Thunoh baotam tamna khokivai hom hoilou na a houbung adam ngaipon, houbung damlou na a lhagao halna aumpoi, lhagao halna umlouna houbung le khosunga pathen gamlut ding jong lhomdingin tahsan aume.

### Houbung pan lah dan:

Masang lai kani,kanja hung sotil laijin khamnathei ahi Christian ten bol lou ding ahi tin houlamkai hon inalhang samji naovin tulang hin koiman jong hiche muchi chung chang a hin aha sei tapoi, Hatah a seiding jong houbung lamkai konkhat in ***Kani kanja kiti hi Pathen thilsem anche jat khat ahin anche chu anche tua kitu ding ahijenge*** atiuvin ahileh houlam kai hon jong aphal uve tin lhangphong tah in kiphatlam na imacha neilou vin alei ilhou taovin ahi. Hinlah tuni chana kimu danin Baptist houbung ho leh Evangelical houbung mihohin alei alho van-gun kiphat lam na khat anei da-

nun akilang jepe. Pastor konkhat in vang houtoh akitoh poi tin tuni chanin ading jing nalai uve.

Kani kanja chule khamnathei dang jouse mong sel a ne hole semho/johho/tuho chu koi hijong leh lhagao hin kho a lungmon na anei lou dingu ahi. Ajeh chu amahon aboipiu chu hiche mihemkhat thina thei chubou hiding ahitai. Kathilbol kanatoh, kaneh kadon hi Pathen deilou ahi tia lung kish na ahin neiuva ahung kilekit kah seova lhagao kipa na neilou amina Christian kiti ho chu hiding ahiuve.

**Thuchaina:** Kuki Baptist Convention in akigel in hiche muchi hin igamsungule ihoubung sunguva kipa nale machal na ahin poh

lut sang in lungjinnale lhagao damthei lou na ahin polut jon ahi. Kumlelha tampi hin bol a kihin so na a hin nei ihi tahjeh un ngah jeng ding jong ipi muchi ituva ikihin so dingu ham ti lung kham na akinei jin, office lama kon muchi chivo peh khel ding akinei lou jeh in Govt toh kitho khoma ipi lampi pena muchi ikhel thei uva ikihinso thei dingu ham ti hi kiboi pi ahi. Hijeh chun kani leibol ngah nadinga toh gon ahung kinei ja igam bih sungu va houbung miten pan lahnading ahung um leh thanom tah a inapan khom uva hiche kani lei ibol uhi isuhmang uva muchi chom ilhouva hindan ikhel thei nadiuvin pan lakhom cheh din ikideisah uve.

## KIPA THU THOT

Pihang Baptist Church KBC No.17 Hou-in thah sahдох theina dinga Centre Church NGV Imphal KBC No.1 Houbung miten sum le pai tampi-a neihin kithopinao chungah Houbung miten Jesu Christa min in kipathu kahin phong uve. Adeh'n Pu Pastor Thangneo Haokip hapan na jal ahijeh in ama le ainsung mite chule aumna Houbung mite chungah Pathen in amimal cheh in phatheina lhingset in petao hen.

Letkam Haokip  
Head Deacon Pihang B.Ch.  
KBC No. 17

Lalneo Touthang  
Secretary Pihang B.Ch.  
KBC No. 17

**REPORT LE KIPA THUPHON****1. KBC Gambih No 16**

Achesa nisim 17th July, 2018 Tuesday nikho hin KBC Gambih No. 16 Pastor pale Gambih Lamkai ho chule Nute lamkai hon Lydia Resource Centre mun ahung villun ngailut thilpeh in Rs 5000/- (Five thousand) only leh An-



chang Bag ni ahinpouvin tilkhouna le taopehna ahung nei un achunguva kipa thu Convention nute jouse thal-hengin ahung kiphonge. Pathenin KBC Gambih No. 16 Lamkai ho le Pastor pa athilpha bol nao chung a phhat thei na thalhing set in pejing tao hen. Kakipeh uve

**2. One Day Seminar Report**

Achesa nisim 25th July, 2018 nikho hin Assembly kiphat sahna dungjuijin One Day Women Leadership Seminar chu Baptist Church Chassad Avenue. Imphal Gambih No. 1 mun a Manipur sung Bandh le General Strike anaum jong le Pathen lungset in Nute lamkai mi 90 kikhomdoh in lolhing tah in akichai theijin Pathen thangvah aume.



### Seminar a Resource Person

- 1 Rev. S. Prim Vaiphei, President, AMCO,  
*Topic: "Leadership in Women Ministry"*
- 2 Miss Helam Haokip, Secretary, IRMA,  
*Topic: "Women in Development"*

Paper Present le hilchet na tahsa le lhagaova Lamkai khat hina dinga Pathen natoh na lam le khantou machal na ding lampi phatah tah eihil un achung lhon a kipathu akiphonge. Pathenin a ministry lhon a phat thei boh jing lhon taken.

Program a minchongho Rev. Thongkhosei gen, Secy, KBC le Rev. Henjalen Doungel chung a jong kipana alenne.

Vahchoi la sa ho Mrs Lhingboi Guite, Mrs Kimneihoi Haokip le Ng, Boisi Vaiphei chuleh ahung kikhom Gambih le Centre Church a Nute Lamkai ho chule tohkhompi Work Committee jouse chungle ahideh a Khonei Houbung miten kin gangtah a kisei hijong leh amun eiphalpeh uva ijakai a eipanpi na chung uvah seijou lou kapana aki phonge. Pathenin phat theina thalhing set in eiboh jing tao hen.

Lhingjanem Haokip  
Secretary, Women Department, KBC

# **YOUTH EMPLOYEES' DAY**



**August 26, 2018, SUNDAY**

# **BQ QUEST**

**October 14, 2018, SUNDAY**

# **YOUTH ANNUAL ASSEMBLY**

**December 12-15, 2018, Wednesday - Saturday**

## Literature Column



# KUKI BAPTIST CONVENTION



## Literary meet 2018

Ahung lhung ding 19th August, 2018 (Sunday) nikho le Centre Church, New Lambulane, Imphal mun a 10 am - 2:30 phat sunga KBC Literary Meet - 2018 umding ahitai. Hiche nikhoa kitetna ding (Competition item) ho chu Sunday School Icon, Choreography, Senior 2 le Pilhing Quiz, Jaila (Poem/poetry) sim, Painting ho hiding ahi.

Hiche KBC Literary Meet a hi ikikloikhom nau KBC ngailutna, gel khohna le khat le khat kitosot tona a, Convention lamkaiho jouse gambih lamkai ho jouse, muntin a KBC houbung lamkaiho le houbung mipiho jouse, chule KBC Worker ho (Pastors, Evangelists, Missionaries ho) jouse hunglha cheh dingin Pakai minin ikitemuvin ahi.

Pre-Literary Meet nia asangpen minga (Besdt/top five) anakilheng doh ho chu anoiya minchong ho ahivu.

### Sunday School Icon

1. Nengngainem Haokip, C/Church, Langol, KBC Gb.No. 1
2. Nengpilhing Doungel, Molkon Khopi, KBC Gb. No. 3
3. Lunxhopao Khongsai, Kulbung, KBC Gb. No. 9
4. Cinggainem Haokip, Mongpijang, KBC Gb. No. 4
5. Kimneilhing Vaiphei, Lungngil, KBC Gb. No. 11

### Poetry

1. Code No. 1015 Seiminlun Dimngel, C/ Church Haokip veng
2. Code No. 1013 Lhinghoikim Haokip, N. Songlung B/Church KBC 4.
3. Code No. 1012 Lamminchong Haokip, N. Songlung B/Church KBC 4.



4. Code No. 1011 Veineivah Haokip G. Kholep, KBC 4
5. Code No. 1002 Roselyn Nenglalpah Leijang khopi, KBC 8

### Essay

- 1st. Sl. No. 30 Jangminthang Haokip Gb. 1
- 2nd. Sl. No. 32 Nemhoiem Haokip Gb. 4
- 3rd. Sl. No. 21 Satkholen Haokip Gb. 9
- 4th. Sl. No. 11 HenRobert Haokip Gb. 9
- 5th. Sl. No. 40 Lhingpinem Haokip Gb. 4

Sunday School Icon le poetry Final Round a dinga hi Pre-Literary Meet a asangpen mi nga (Best/top five) anakilheng doh ho chu hungpang diu ahi. Essay Writing a First, second, third analaho chu hiche nile hin Prize sanga hung diu, fourth le fith position teni jong consolation Prize sang a hung diu ahi.

*Pastor Haoneo Haokip*  
*Secretary*  
*Litrature & Publication*

## Education Column

### CHRISTIAN EDUCATION SUNDAY – 2018

Sept. 9, 2018(Second Sunday)

**Theme:- “. . . .Nangma nakichinsah  
 chengse hi hong-phan”, (1 Timothy 6:20,21)**

Pakai lenggam a dia tokhompi Pakai lhacha te leh Houbung tin a lamkai jouse Christian Education board min in ngailutuna Chibai kahinboh un, nahenguva temna le hetsah nom chu;

Kum dang'a i-naman jingsao banga tukum'a jong CHRISTIAN EDUCATION SUNDAY imanna diu hi ahunglung ding Sept. 9 ahitan, hiche a dinga kigottupna ina-neipan tahdiuvin iki temuve. Noija hung kipe Chart a minchong ho cheng(CEC member ho) in lungset tah a Prog. isuhbulhit cheh diuvin jong temihiuve. Hiche chart a kimin phah lou tokhompi Pastor jousen jong munkhat cheh ah kimantei igotdiu katarsan in, Guest Speaker umtheilouna Houbung hon jong anikho'a dia hung kitah doh Thupi hi mangcha a Houbung tin in Thilpeh leh taona a kitup tah a i-man cheh dingun kahin temuve. Education board

a dia TAONA le TOKHOM ineinauva imujat hou Office lam'a aphatcha'a ihung thah chehdiu, hichu Pakai lenggam a dia ipan khomnao lenpen ahi ti kahin geldoh sahnom kit un ahi.

<b>SI no</b>	<b>SPEAKER DING HO</b>	<b>ACHENA DING HOU-BUNG</b>
1.	Rev. Onthang, Edn Secy.	Khopijang B/Ch (12)
2.	Dr L.Haokholet, Chairman Edn Board C/C	Salem village, Sapormeina (4)
3.	Upa L. Yampu, Edn B/Member	K.Songlung B/Ch (1) (2)
4.	Pu Jangmang, Edn B/M	KhodengThabi B/Ch (15)
5.	Rev. Dr M.Thongkhosei, Gen Secy. Ex Officio-member, Edn Board	Chahkap B/Ch (12)
6.	Rev Letpu, Fin. Secy. Edn B/Ex-Off. Member	Saitu B/Ch (4)
7.	Rev Kamboi, Secy. M/Dept.	Pangjang B/Ch (3)
8.	Pastor Haoneo, Secy. Litt. & Pub.	G.Songlung B/Ch (4)
9.	Rev Henjalen, M/E Secy.	Ekou Mulam B/Ch. (19)
10.	Ms Anem, Secy. W/Dept	Chassad Avenue (1)
11.	Pastor Satminlen, Secy. Youth Dept.	Kotlen B/Ch (6)
12.	Pastor Henkholen, Dir., Development	Saheibung B/Ch. (7)
13.	Mrs Lhingkhohoi, Warden WWH	Hd Qtr Fellow-ship Ch.
14.	Mr Seikholen, Warden STS	G.Gelbung B/Ch (4)
15.	Rev. Dr H.Haokip, Prez KBC	N.Songlung B/Ch (4)
16.	Pu Lhunthang Kipgen, Vice Prez. KBC	Phaijang B/Ch. (4)
17.	Pu Tonghen Kipgen, Chairman, Litr & Pub.	Keithelmanbi Solam B/Ch. (5)
18.	Rev N. Baite, Chairman, Pension Board	Hengjang B/Ch. (4)
19.	Pastor Haopu, Principal, DCA	H. Mongjang B/Ch (15)
20.	Pu M.Thangboi, Acct. DCA	Haolenphai B/C (15)
21.	Evan Haopu, Mission Asst.	B.Boljang B/Ch
22.	Pu Alun Haolai, Ex-Prez, KBC	Haijang B/Ch.(10)
23.	Rev Onmang, Ex-Prez. Men Dept.	Molnom B/Ch (16)
24.	Pu Jamkhotang, M/E Chairman	New Keithel-manbi B/Ch (7)
25.	Pu Lenboi Singisit, Prez. Men Dept.	Khoken B/Ch (7)
26.	Pu James Doungel, Youth Prez.	T.Champhai B/Ch (8)
27.	Pi Hekim, W/Prez.	S.Molcham B/Ch (8)
28.	Rev. Silas Boipu, Director, STS	Saisijang B/Ch. (19)
29.	Rev Paul Paolen, Academic Dean, STS	L.sareikhong B/Ch. (2)
30.	Rev Y. Haokip, Chairman, Theol. Board	Maohing B/Ch (5)
31.	Evan. Lalbem, PA to GS	Mongpijang B/Ch (4)
32.	Rev J.Kipgen,	Sipijang B/Ch (4)
33.	Mr Ginneo, Lecturer STS	Kholep B/Ch (4)
34.	Pu Doulet, Principal, Kanggui Xtn College	Gopibung B/Ch. (5)
35.	Rev Ngulpao, C/C Sa-lem Vill. Sapormeina	C/C Haokip venglmpchal

Chunga hung kimin phah cheng hihen akiminphah lou ho hijong leh Pakai min'a "Christian Education Day" nia kalsong doh jouse ahungna diu Houbung lamkai ten neh le don chule kipaman/Cholam jong kilo-mdeuva inagot peh cheh diuvin Pakai min in tem ihuive.

### PROGRAM HIGH-LIGHT

Houkhom lamkai	: S/S Spdt.
Phatpat taona	: Chairman, Men Dept.
Labung	: BYD
Bible simdoh	: Chair person, W/Dept.
Offering ho lhandoh	: Pastor/Hd Dn/ any
Special no.	: Jillai ho(Student ho)
Thupi seiding	: Pastor/Head Dn/Guest speaker
Kikhenna taona – mipi	: Achaiding - M/E Chairman

### Anikho a Taona ding Item ho:-

1. Pathen phatthei boh ichan nao Chate themjil ho leh Institution inei hou jal in thangvahna peuhite.
2. Insung tin leh Houbung tin a khangthah simlai ho jouse alolhintheina diuvin taopeh ute.
3. Houbung tin'a Jilkung inei hou jouse Pathen lunglhaina a atohtheina jingna diuvin taopeh ute.
4. Institution inei hou, Dr Colvin Academy Moreh, Kanggui Christian College Kangpokpi Pathen lunglhaina a pilhing tah isojoura theina dingun, chuleh asunga natong ho'a din taopeh ute.
5. Education Board member ho taopeh ute.

### Vannoija Education Day itih a kimangpan ham, chule ipijeh a kimang ji ham?

1966 kum chun vannoija kiloikhomna UNESCO ten Sept. 8 nikho hi World literacy day tin anaphongdoh un ahi. Hiche banjom a chu kumsih leh September lha a 2nd Sunday hi Word Education Sunday tia tuini chan'a hi hung kimang jing peh ahitai. India te'n November 11,1947 nikho a pat Jalen galsat lamkai minthang Maulana Abdul Kalam Azad, Education Minister masapen pa 'pen nikho'(Birthday) geldohna a 'Education day' a ahinmanpeh u ahi. Hiche nikho kiman nile hin Themjilna lam thu hi kiha seipenji ahi. Eiho dinmun a Tahsa le Lhagao gomto a Thep jilna lam ikhantoupi theina dinguva thupi tah a iman diu akideisah jeh a hiche nikho a Prog. hi hung kigonga chule thupi hi hung kitah doh ahi.

## ANIKHO A DIA HUNG KITAH DOH THUPI DOI LE TUP

Pathen in mihing jouse hitheina/boltheina thilpeh (Talent) jatchom cheh eipeuve. Eithilpeh hou mang them le chingtup dingin engen-seuve. Hiche thilpeh ho chu; Chihna thepna leh hetna, boltheina chul-eh tonsot hinna tia hopkhen thei ahi.

Inam sunguvah Miching-Lekha them tampi ahung kispdoh ding ingaichajingun ahi. Hiho chun Pathen deija amanuva tahsa leh Lhagao-va eipui khang diu ideijun, Pathen deija amanlou vuleh Satan deilam ana hikha thei ahi. Nitin chondan leh hinkho theng manding akuldan Paul in Timothy ahilna a kon'a thupi hi eima hitheina dol a iseinao chan ah Pathen lhagaovin eimangcha cheh uhen.

## Convention Secretaries tour

KBC Secretaries tour hung kichejom jing to lhonin achesa nisim 7 Aug nin gambih No 6 (T. Vaichong Area) vilna Kotlen Baptist Church muna agakinei jin ahi. Jingkah matah in Head Quarter akon anakikal songin kipa um tah in gambih sung houbung atamjo ahung pang cheh un ahi. General secretary Rev Dr Thongkhosei Haokip in tule tua Convention tohdinga kigong hole Diamond Jubilee project kibol ho, chule convention sunga Department ho natoh thilbol ho bannei chan phondoh na ahin neijin chujou vin kihou liim na akinei khom in ahi. Tule tua convention natoh le thilkibol ho chungga kipa thu ase in un chu le houbung a kona jong jochana jubilee kum ahito lhona pan hinla dingin lung gel aphonng doh un ahi. Pathen in gambih no 6 phat hie boh jing taken.

Gambih no 7,8 le 9 a jong achesa 14,21 le 28 July nichun Secretaries tour agakibol in ahi. Gambih 7 New Keithelmanbi Baptist Church munah gambih centre thenso nale secretaries tour sutjom na anakinei jin ahi. Gambih houbung lamkai jouse hiche kina hin pan ahung lacheh un ahi. Kin Thempun Rev Lamkeng Lhouvum apang in chule Thupi sei jin Rev. Dr Thongkhosei Haokip Gen Secretary apang in ahi. Kumtampi lut na gambih houbung miten ahin boipi Gambih office hung kisajou ahijalin kipa ankong sokhom na jong akinei jin ahi. Gambih no 8 houbung vilnan Centre Church Tuibong muna kikhop khomna akinei jin chule Gambih no 9 vilna hi Tuinom Khopi Baptist Church muna akinei khomin ahi. Gambih teni a hin houbung lamkai atamjocheh ahung pang in kipa umtah chu Gambih houbung hon

Convention office tohgon ho pachat na thu aseï un chule Jubilee tohgon ho a jong jochan a hung pang din phondoh na anei cheh un ahi. Pathen in Gambih houbung mite phat thei boh jing taken.

## **MBC Secretaries visit to KBC office.**

Achesa nisim 17 July 2018 nichun MBC Secretary hon KBC office ngailut vilna eihung neiun ahi. Pu Rev Dr W.Konghar General Secretary in ahin lamkai jin, women Secretary, Peace and Development secretary chule Youth secretary ahung un ahi. Amaho to kihoulimna a Rev Dr Thongkhosei Haokip in tuni chana MBC share hung kipe talou chung chang thu ahin podoh in MBC in lampi khat angaito a KBC dinmunhi hatthem peh na anei din temna anei jin ahi. Kiihoulim anakinei khom in Manipur Theological College ahi houbung lamkai ho ding short term course chom chom gonpeh a houbung lamkaiho Pathen thua kibulphuna pha sempeh ding tohgon neipeh din temna akinei jin ahileh MBC lamkai hon pha asah nao aphongun ahi. Kipah taha eihung vilnao chung a kipa thu akiseijin ngailut chadon khom pina akinei pin ahi.

## **Rev Seikholet Singson kum 95 lhinna kimanpeh**

Achesa nisim 26 nichun Rev Dr Thongkhosei Haokip KBC general Secretary lamkainan Rev Seikholet Singson KBC Founder pa hinkumkho 66 lhinna lha Convention office Secretary hole office staff ho jouse pan nan achena kho Bongmol a Birth Month agakiman peh in ahi. Birth Month akitilona hi amatah in anikho akihetchet lou na aseija alhavang July lha 1923 hidinga atahsan jalla Birth Month hung kiti ahi. Office lama konin jokham kham in sum akitoh khom in Cake hoisel khat akichon agakineh khom pin chule Convention office mina kibol ahijehin office Treasury akon Rs 2000 (two thousand only) pennikho kipa pinan akipen ahi. General Secretary in houlimna anei jin ngailut chadon khomnale Cake neh khompina akinei jin ahi. Rev Seikholet hi KBC Founder tin jong akihen tuni chanin alungthim le ahetna akicheh lheh jeng nalai je. Achesa KBC thusim luiho seidoh na anei jin chule hiche birth month kiman peh na chung akipana thu aseï in ahi. Thilkibol nakitong chung a kipa thu insung miten jong aseïun Pathen henga taokhomna akinei khom in ahi.

Rev Seikholet Singson hi Kuki chate titah louva Manipur pumpia Reverend Ordained chang masa pen anahi. Amahi MBC General Secretary masapen jong anahi. KBC a suhmil thei lou houlamkai luipen khat ahina bangin MBC a jong suhmil thei lou lamkai khat chu ahijenge. Amahi chamna deimi ahin amachang phatchom nading hol louva Convention ding jeng gel mi anahi. Changval inmun lounun lamnadin Foreign loile pai koma sumlepai anathum pon, tunichana kitah na neitah a Christian hinkho mangjing hou lamkai luipen inei sunu chu ahi. Asenjin adalah jouvin angailu loile gol tampin jinei kit din temna ananeiun ahileh "Pathen anga jidinga kakisana kakiteppi kaji tilou jidang neiponge" anatin tuni chanin ajingailut nale ajiadia akitah na vetsah nan jinei kit talou vin aumtan ahi. Amatabang houlamkai inei khah uhi ivangphat naolen pen ahin athinungle ngailut vetsah na a thutamta seija alongchunga thilpha tampi bolsangin tu adam pethin houbung achethei chan cheuhitin gaveo hitin ingailut naoleh ihomthonao thu gaseipeh u hite.

## SAJAL BAPTIST CHURCH HOUIN

(Church New Building)

### Thenso hita.

Achesa 7th June 2018 nikhochun Sajal Houinthah chu thensona akineitan ahi.

Rev Lamkeng Lhouvum Pastor KBC No.7 in Thenso na kin alan, kilomtah in Pa Pathen, Chapa Pathen chuleh Lhagaotheng Pathen in katdohna aneitan ahi.

Rev Dr. M Thongkhosei Haokip General Secretary KBC in "Ka in chu Taona in kiti ding ahi" ahi tin Thupi ngeitah aseijin ahi.

Hitichun Gambih sunga Houbung ho tampi le Lhangsung Haosa upa tampi ahungpang in kilomtah in Houin thensona loupitah chu akineitan ahi.

Pathen chu thangvah in um jingtahen

Pakaija natoh khompiu

Pu Kaikhokam @ Kamboi Haokip

Head Deacon

Sajal Baptist Church

KBC No.7

## KBC Gambih No.7 Office thenso hita.



Pathen lungset le vangboh najallin 2015 a patna hung kiboipi KBC Gambih No.7 Office thensohita. Gambih Houbung mite ho hapan najal le a kho a Haosa ho, chuleh adeh in Pu Ngamthang Honble MLA Saitu A/C EX-Minister & Family ho hapan najallin-Pathen lungset in In sahchajjin aumthei tan ahi.

Hijeh chun 14th July 2018 nikho in Rev Lamkeng Lhouvum Gambih Pastor pa Kin Thempu hi na in kilomtah le loupitah chu, Pa Pathen, Chapa Pathen chuleh Lhagaotheng Pathen minin kot hondohna aneitan ahi.

Hiche nikhohin, Rev Dr. M. Thongkhosei Haokip General Secretary in tilkhouna thu asejgin ahi. Chuleh KBC Office a konin Dept. Secretary ho tampi jong ahungpang in ahi. Lhangsunga kineppiumtah Haosa ho le Houbung lamkai ho tampi ahungpangun ahi. Hiche in Thenso nadinga hi Pu Manggin Haokip Loibolkholen le insung mite hon Bongchalkhat ahintoh un kipathu akiphonge.

Pathen in KBC Gambih No.7 phatthei bohjing tachen.

Pakai a natoh khompui

1. Pu Haokhongam Haokip  
Chairman KBC No.7
2. Pu Lalkohao Lotzem  
Secretary KBC No.7

## KBC PENSIONER HO

### C/ Church CananVeng, Imphal in ngailut ankong sokhom pi

Achesa 15th December, 2017 (Frida) vin Centre Church KananVeng, Imphal hon KBC pensioner ho ngailut ankong eisempeh uvin, blanket khatcheh le cholamdangka 500 Advent Christmas jong eimankhompui'vin, pensioner ho nilhumkon ngen ahi tan, khonung leh kisihnalou ding a, thilpeh nekhom abol uhi khonung ajong Houbunga gasona hung heta hen.

Rev. Tongmang Haokip le Houbung mipi ho chung a Pathen in phatthei boh tanen.

Tukum KBC General Assembly 25th January, 2018 (Thursday) nikho a Centre Church Kangpokpi hon jong KBC pensioner ho blanket khatcheh a atom'u. Pensioner ho ding injong Houbung ho ding in jong lungnachim a um lhehjeng e. Chuleh, Pastor Khuptinlal Hangsing le Centre Church mipi ho natohpha abol uhi gaso chehcheh ta hen.

Keima,

Rev. ChungmangHaokip, Retd. Pastor, KBC.

## Gambih No. 13 Chapang Camp



Achesa nisim 28th July to 2nd August 2018 sunghin KBC Women Department le Gambih No. 13 Women Department kitho khom a chapang camp chu Khangbarol B/Church mun a lolhing tah in akichai tai. Camp Speaker Evan. Thangboi Kipgen Camp Dir. Pastor Khupjoyful Singson.


Tuchung Camp a pan laho jouse chung a kipathu ahung kiseije, Pathen in phatthei naboh cheh taohen.

Mrs. Nemhoi W/ Secretary, KBC No. 13





**KBC Women Department in organised  
abol 25th July nia Leaders Oneday  
Seminar Chassad Avenue a anakibol na.**



**Gambih No 7 a Gambih  
Centre Thensona Kin Pu  
General Secretary, Rev.  
Thongkhosei Haokip in  
aganei na ahi.**

**Office Staff jousen  
Nisim 2-3 Aug. nikhon  
Office renovation a  
painting akibolkhom in  
ahi.**



Post Regd. MNP/81  
Regd No. 18134/88



2018 Anthah lop mun chomchom a  
thupi tah in akimang tai

If undelivered, please return to  
**The Editor, KBC Thuso**  
KUKI BAPTIST CONVENTION  
Opp. DM College, Imphal - 795 001  
Contact: 9862633173